

«Scolas rumantschas d'impurtanza essenziala»

Patratgs ed infurmaziuns per l'entschatta da l'onn da scola

■ (anr/fa) Glindesdi han cumenzà stgars 1700 uffants la scola primara. Per il futur da las scolas rumantschas vegn ad esser decisiva la dumonda, sch'ins chatta sufficientamain magistras e magisters che instrueschan rumantsch. «Rumantsch grischun vegni instrui en las scolas dal Surses, a Savognin, Casti ed a Lantsch sco era a Trin, Domat e Cuir», infurmescha Urs Cadruvi, il secretari general da la Lia Rumantscha (LR). Returnadas a l'idiom èn 17 scolas. Ch'i sa tractia da las oriundas vischnancas pionieras, en Surselva senza la Cadi e Lumnezia ed era las scolas da la Val Müstair, precischa el, «quellas han per part ina u pliras classes che cuntinueschan u fineschan la scola en rumantsch grischun.» Cadruvi exprima intgins patratgs davart las scolas rumantschas e lur muntada per la lingua.

«Spert in'emprima basa»

A l'avis dal secretari da la LR èsi allegraivel ch'i dat il sistem da scola rumantscha: «Quellas èn en in tschert senn sco las scolas bilinguas era in model cun duas linguas, cunquai ch'ils uffants cumenzan gia a partir da la terza classa ad emprender era tudestg. Durant ils emprims dus onns han ils uffants dentant l'ocasiun da furmar ina emprima basa per la lingua rumantscha». Cadruvi menziuna il grond engaschament da la magistraglia che saja fitg motivada ed enconuschia la plivalur da savair sper las autras linguas era rumantsch: «Las scolastas ed ils scolasts rinforzan cun lur instruziun questa lingua e rendan conscient ad uffants e geniturs tge stgazi che quai signifitga da pudair emprender



Dapi glindesdi scuntran ins puspè scolaras e scolars sin las vias. Quà l'emprima classa da Laax cun Angela Deflorin.

FOTO A.BEELI

rumantsch». L'impurtanza da la scolaiziun rumantscha è, sco ch'el punctuescha, fitg gronda per promover il linguatg: «Al cumenzament è il ravugl da la famiglia decisiv per emprender la lingua, suenter dentant è quai era il ravugl dals conscolars». Cun il sustegn da lur magistras e magisters pon ils uffants rinforzar durant la scola primara lur enconuschientschas da la lingua rumantscha.

«Grondas sfidas per il futur»

Per il futur da las scolas rumantschas numna Urs Cadruvi duas sfidas principalas: «D'ina vart vegn ad esser la gronda sfida da chattar sufficientamain magistras e magisters che san bain avunda rumantsch per instruir quella lingua.» L'autra sfida è la dumonda davart il sustegn da la populaziun: «Vegnin nus ad avair vinavant il sustegn da la populaziun e surtut dals

geniturs, u dian quels in bel di ch'il rumantsch na servia en quest mund globalisà avunda a lur uffants ch'i fiss meglier d'emprender englais u autras linguas?» Il secretari da la LR è persuas che quai fiss ina faussa conclusiun dals geniturs: «Quel che sa bain rumantsch bada spert che questa lingua na serva betg mo per emprender linguas romanas, mabain era per l'englais.»

Success per scola bilingua da Domat

En il Grischun datti diesch scolas bilinguas: Las scolas primaras da Bever, La Punt-Chamues-ch, Puntraschigna, Schlarigna e Trin (rumantsch/tudestg) e quella da Malögia (talian/tudestg), la scola da Samedan (rumantsch/tudestg). Las scolas primaras da Domat e Glion èn tudestgas, ellas han dentant era blassa bilinguas (tudestg/rumantsch). Il medem vala era per la citad da Cuir, qua han ins schizunt classes bilinguas per tudestg/rumantsch e tudestg/talian. Markus Schwarz, il manader da la scola primara da Domat, fa bilantscha: «Quest è uss il terz onn che nus avain nossa scola bilingua. Fin uss vai bain cun la scola, nus avain bleras annunziadas.» L'emprim onn han s'annunziads 13 scolars e scolaras per questa scola, il segund onn 21 ed uss il terz onn esa puspè 18 uffants. «Quest interess per nossa scola bilingua è pli grond che spetgà.» Ina part dals uffants che frequentan la scola bilingua derivan da famiglias rumantschas, ils auters uffants èn da lingua tudestga. Els emprendan rumantsch pir a scola. La scola bilingua dura fin la sisavla classa. «Suenter ston ins guardar co ch'ins vul far cun il stgalim superieur», declera Schwarz, «sche l'interess resta uschè grond sco ch'el è per il mument ha la purschida da la scola bilingua da Domat in bun avegnir.» (anr/fa)